



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-I/21-3-40-491-5/21**
Datum: **25.01.2022. godine**

„Agencija za vodno područje rijeke Save“ Sarajevo rješavajući po zahtjevu pravnog lica „ĐUZELIĆ“ d.o.o. Cazin, za izdavanje vodne dozvole za ispuštanje tehnoloških otpadnih voda i aktivnosti koje mogu imati specifične uticaje na vode pri izvođenju aktivnosti na lokaciji objekta postrojenja za proizvodnju betona sa pratećim sadržajima, na osnovu člana 139. stav (1) tačka 3. i 10. Zakona o vodama („Službene novine Federacije BiH“, broj 70/06) i člana 200. stav (1) Zakona o upravnom postupku („Službene novine Federacije BiH“, broj 2/98 i 48/99), donosi:

RJEŠENJE **o vodnoj dozvoli**

1. Daje se vodna dozvola pravnom licu „ĐUZELIĆ“ d.o.o. Cazin, za ispuštanje tehnoloških otpadnih voda i aktivnosti koje mogu imati specifične uticaje na vode pri izvođenju aktivnosti na lokaciji objekta pogona za proizvodnju betona sa pratećim sadržajima, izgrađenog na zemljištu označenom kao k.č. broj 441 i 442 K.O. Ostrožac (novi katastarski operat), odnosno k.č. broj 810/1, 810/14 i 821/3 K.O. Ostrožac (stari katastarski operat), Grad Cazin.
2. Ova vodna dozvola se odnosi isključivo na ispuštanje tehnoloških otpadnih voda i aktivnosti koje mogu imati specifičan uticaj na vode pri izvođenju aktivnosti na lokaciji predmetnog poslovnog objekta definisanog tačkom 1. ovog rješenja i ne oslobađa podnosioca zahtjeva obaveze pribavljanja vodne dozvole za korištenje vode i ispuštanje sanitarnih otpadnih voda, za čije je izdavanje nadležno Ministarstvo poljoprivrede vodoprivrede i šumarstva Unsko-sanskog kantona, u skladu sa članom 139. stav 2. tačka 1. i 2. Zakona o vodama.
3. Vodna dozvola se daje na osnovu činjeničnog stanja utvrđenog pregledom dostavljene dokumentacije i izvršenim uviđajem na objektu, pod slijedećim uslovima:
 - 3.1. Da se u roku važenja ovog rješenja izvrši korekcija dopunjene projektne dokumentacije (Dopuna glavnog projekta sakupljanja, odvođenja i prečišćavanja otpadnih voda sa lokaliteta betonare „ĐUZELIĆ“ d.o.o. Cazin; urađen od strane Instituta za kvalitet, standardizaciju i ekologiju TQM d.o.o. Lukavac pod brojem: 2510/21 jula 2021. godine, revidiran od strane Euroing d.o.o. Bihać pod brojem: REV 21-08/21, augusta 2021. godine, u Bihaću), na način:
 - Da se predvidi plato za pranje automješalica i radnih mašina te zbrinjavanje neutrošenih količina betona iz istih, čija će površina biti vodonepropusno izvedena, oivičena od ostalih saobraćajnih i drugih površina te nivelisana ka taložniku predviđenom za smirenje i taloženje tehnoloških otpadnih voda nastalih na prostoru radnih površina betonare i platoa za pranje automješalica, čiji će preliv biti spojen na uređaj za prečišćavanje onečišćenih voda.
 - Da se onemogućí slijevanje potencijalno zauljenih, odnosno onečišćenih oborinskih voda sa internih saobraćajnih i drugih površina na površinu platoa za pranje automješalica. Na platou predvidjeti sapiranje samo bubnja automješalica, odnosno sapiranje svježje betonske smješe sa istih i odlaganje neutrošenih količina betona iz istih. Pranje vanjskih površina automješalica, odnosno njihovo održavanje ne vršiti na površini platoa, odnosno vršiti na zato predviđenim mjestima.
 - Da se razdvoji sakupljanje tehnoloških otpadnih voda nastalih sapiranjem radnih površina betonare i automješalica od potencijalno zauljenih oborinskih voda sa prostora internih saobraćajnih površina. Potencijalno zauljene oborinske vode zbrinjavati u skladu sa Odlukom o odvodnji otpadnih voda Grada Cazina.

- Da se definiše sistem za recirkulaciju/povrat prečišćenih tehnoloških voda iz taložnika u proizvodni proces, sa svim potrebnim proračunima, nacrtima i opisima te definisanim svim instalacijama prihvata, tretmana te povrata vode u tehnološki proces u skladu sa mjerama zaštite izvorišta „Vignjevići“, općina Cazin; tačka 2., stav b rješenja o vodoprivrednoj saglasnosti izdanog dana 21.05.2008. godine, pod brojem 08-25-5731-UP-1/08, od strane Kantonalnog ministarstva poljoprivrede, vodoprivrede i šumarstva Unsko-sanskog kantona, odnosno iste uskladiti prema inoviranim mjerama (urađene prema Pravilniku o načinu utvrđivanja uslova za određivanje zona sanitarne zaštite i zaštitnih mjera za izvorišta vode za javno vodosnabdijevanje“, Službene novine Federacije BiH“, broj 88/12) sanitarne zaštite izvorišta Vignjevići. Prema riječim investitora, nabavljen je uređaj za tretman i recirkulaciju tehnološke otpadne vode u proizvodni proces, a koji nije prikazan projektnom dokumentacijom.
 - Usvojenim sistemom prečišćavanja otpadnih voda mora se obezbjediti kvalitet efluenta u skladu sa propisanim graničnim vrijednostima emisije u prečišćenoj vodi, definisane u tabeli 1. Priloga 27. Uredbom o uslovima ispuštanja otpadnih voda u okoliš i sisteme javne kanalizacije („Službene novine Federacije BiH“, broj:26/20, 96/20).
 - Preliv iz taložnika, preko uređaja za prečišćavanje otpadnih voda i monitoring okna odvesti do recipijenta, dati osnovne podatke o istom. Ispust u recipijent prikazati u adekvatnoj razmjeri. Recipijent prečišćenih otpadnih voda ne može biti upojni bunar.
 - Da korisnik poslovnog objekta izvrši izgradnju monitoring okna (revizionog šahta) nakon taložnika, a sve u skladu sa članom 19. Uredbe o uslovima ispuštanja otpadnih voda u okoliš i sisteme javne kanalizacije („Sl. novine Federacije BiH“, broj: 26/20, 96/20).
 - Da se redovno vrši monitoring prečišćene otpadne vode iz okna za monitoring shodno članu 19. i 20. Uredbe o uslovima ispuštanja otpadnih voda u okoliš i sisteme javne kanalizacije, te pojedinačne i zbirne godišnje izvještaje dostave Agenciji u skladu sa članom 23. iste Uredbe.
 - Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaju i načinu davanja ovlasti („Službene novine Federacije BiH“, broj 14/10, 14/13 i 26/14).
 - Uraditi detaljan dinamički plan koji sadrži spisak aktivnosti i mjera sa finansijskom procenom za ulaganja i smanjenje emisija sa predviđenim završetkom aktivnosti najkasnije do roka iz stava (1) člana 26. Uredbe (19.12.2023. godine).
 - Dinamičkim planom predvidjeti i nabavku PVC posude za smještaj plastičnih bačvi (predviđeno dopunom glavnog projekta) u kojima se drže aditivi, a u cilju sprečavanja eventualnog istjecanja aditiva u okolni prostor.
- 3.2. Da korisnik predmetnih objekata pogona za proizvodnju betona, isti održava u funkcionalnom stanju i koristi u skladu sa njegovom prirodom i namjenom te u skladu sa uslovima iz ove vodne dozvole, okolinskom dozvolom te saglasnostima i dozvolama dobivenim od strane drugih nadležnih organa.
 - 3.3. Da se istrošena ulja, nauljene krpe i sav opasan otpad koji se može pojaviti u proizvodnom procesu i u procesu čišćenja i održavanja postrojenja i radnih mašina redovno prikuplja i propisno, privremeno skladišti u metalne spremnike, do krajnjeg, ekološki prihvatljivog zbrinjavanja od strane ovlaštene organizacije, a prema sačinjenom ugovoru.
 - 3.4. Da se sa opasnim i štetnim materijama (aditivi betonu, i sl.) postupa savjesno pri skladištenju, transportu i pretovaru kako ne bi došlo do štetnih posljedice uslijed prosipanja istih.
 - 3.5. Da se opasni materijal i otpad, koji nastaje na predmetnom lokalitetu, ne smije ni privremeno odlagati na česticu «vodno dobro», prostoru zaštitnih zona izvorišta vode za piće, odnosno u vodotok i na njegove obale.
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07, 46/09, 79/11, 88/12 i 03/16), Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
 5. U periodu važenja ove dozvole, Investitor „DUZELIC“ d.o.o. Cazin je dužan provoditi sve mjere i aktivnosti propisane istom.

6. Ukoliko radom predmetnog objekta dođe do promjene režima površinskih i/ili podzemnih voda, a te promjene prouzrokuju štete ma kakvog karaktera, korisnik vodne dozvole je obavezan uzroke štete otkloniti, a nastalu štetu nadoknaditi.
7. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
8. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na objektima predmetnog objekta obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
9. Ova vodna dozvola, shodno članu 26. stav (1) Uredbe o ispuštanju otpadnih voda u okoliš i sisteme javne kanalizacije se daje sa rokom važenja do 19.12.2023. godine.
10. Ovo rješenje prestaje da važi u roku 1 (jedne) godine dana, od dana pravosnažnosti istog, ukoliko podnositelj zahtjeva ne izvrši obavezu definiranu tačkom 3.1. rješenja.
11. Prije isteka važnosti ove dozvole, Investitor je dužan da podnese zahtjev za izdavanje nove vodne dozvole.
12. Ovo rješenje o vodnoj dozvoli se može izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. i/ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.
13. Uslov za izdavanje nove vodne dozvole je ispunjenje uslova iz dispozitiva ovog Rješenja i ako se ne izvrše radovi predviđeni ovim vodnim aktom, produženje vodnog akta istekom važnosti ovog rješenja neće biti moguće.

O b r a z l o ž e n j e

Pravno lice, „ĐUZELIĆ“ d.o.o. Cazin, obratio se ovoj Agenciji dana 18.10.2021. godine zahtjevom za izdavanje vodne dozvole za ispuštanje tehnoloških otpadnih voda i aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u toku rada postrojenja za proizvodnju betona sa pratećim sadržajima, izgrađenog u naselju Ostrožac, Grad Cazin.

U provedenom postupku, uz zahtjev za izdavanje vodne dozvole dostavljena je i pregledana slijedeća dokumentacija:

- Ovjerena kopija rješenja o izmjenama podataka, broj: 017-0-Reg-21-000030, izdano dana 08.01.2021. godine, od strane Općinskog suda u Bihaću,
- Ovjerena kopija uvjerenja o poreznoj registraciji, izdano dana 12.11.2002. godine, od strane Federalnog ministarstva finansija, Porezne uprave – Kantonalni ured BIHAĆ,
- Ovjerena kopija Uvjerenja o registraciji/upisu u Jedinostveni registar obveznika indirektnih poreza, izdano od strane Uprave za indirektno-neizravno oporezivanje Banjaluka, broj 04/1-UPJR/1-4364-2/07, dana 06.07.2007. godine, u Banjaluci,
- Kopija uplatnog naloga upravne pristojbe i federalna administrativna taksa,
- Ovjerena kopija rješenja, kojim se daje urbanistička saglasnost investitoru Đuzelić Atifu iz Ostrošca, općina Cazin, za izgradnju betonare na zemljištu označenom kao k.č. 441 i 442 (novi katastarski operat), što po starom katastarskom operatu predstavlja k.č. broj: 810/1, 810/14 i 821/3 K.O. Ostrožac, općina Cazin; izdano od strane Kantonalnog ministarstva za građenje, prostorno uređenje i zaštitu okoline Unsko-sanskog kantona pod brojem 11/2-23-385-UP-1/2008, dana 31.01.2008. godine,
- Ovjerena kopija rješenja, kojim se mijenja dio tačke 1. dispozitiva Rješenja Kantonalnog ministarstva za građenje, prostorno uređenje i zaštite okoline broj 11/2-23-385-UP-I/2008 od 31.01.2008. godine, tako da glasi: „Daje se URBANISTIČKA SAGLASNOST investitoru d.o.o. Đuzelić Cazin iz Cazina, za izgradnju betonare na zemljištu označenom kao k.č. broj 441 i 442 (novi katastarski operat) što po starom katastarskom operatu predstavlja k.č. broj 810/1, 810/14 i 821/3, k.o. Ostrožac, općina Cazin; izdano od strane Kantonalnog ministarstva za građenje, prostorno uređenje i zaštitu okoline Unsko-sanskog kantona pod brojem 11/2-23-8294-UP-1/08 dana 04.07.2008. godine,
- Ovjerena kopija Rješenja, kojim se daje investitoru d.o.o. „ĐUZELIĆ“ Cazin, općina Cazin, odobrenje za građenje za izgradnju objekta betonare na zemljištu označenom kao k.č. broj: 441 i 442 (novi kat. operat), što po starom katastarskom operatu predstavlja k.č. broj: 810/1, 810/14 i 821/3 K.O. Ostrožac, općina Cazin; izdano od strane Kantonalnog ministarstva za građenje, prostorno uređenje i zaštitu okoline Unsko-sanskog kantona pod brojem 11/2-23-8405-UP-1/08 dana 07.07.2008. godine,
- Ovjerena kopija Rješenja, kojim se odobrava investitoru „ĐUZELIĆ“ d.o.o. Cazin iz Cazina da može koristiti izgrađeni objekt betonare, izgrađen na zemljištu označenom kao k.č. br. 441 i 442 (novi katastarski operat), što po starom katastarskom operatu predstavlja k.č. br. 810/1, 810/4 i 821/3 k.o. Ostrožac, općina Cazin, za koje je rješenjem Kantonalnog ministarstva za građenje, prostorno uređenje i zaštitu okoline izdano odobrenje za građenje, broj: 11/2-23-8045-UP-1/08 od 07.07.2008. godine; izdano od strane Ministarstva za građenje, prostorno uređenje i zaštitu okoline Unsko-sanskog kantona pod brojem 11-23-18490-UP-1/11, dana 16.04.2013. godine, u Bihaću,

- Ovjerena kopija Rješenja, kojim se daje vodoprivredna saglasnost investitoru Đuzelić (Redžo) Atifu, Ostrožac općina Cazin, za izgradnju objekta betonare na lokaciji Ostrožac brdo, općina Cazin, na zemljištu označenom kao k.č. broj: 441 i 442, po novom premjeru, k.o. Ostrožac, općina Cazin; izdano od strane Kantonalnog ministarstva poljoprivrede, vodoprivrede i šumarstva Unsko-sanskog kantona pod brojem 08-25-5731-UP-1/08, dana 21.05.2008. godine, u Bihaću,
- Kopija rješenja o vodnoj dozvoli; izdano od strane Agencije za vodno područje rijeke Save Sarajevo pod brojem UP-I/25-3-40-439-7/18, dana 02.11.2018. godine,
- Kopija rješenja o okolišnoj dozvoli, kojim se izdaje okolišna dozvola operatoru „Đuzelić“ d.o.o. Cazin za pogon za proizvodnju betona na lokalitetu Ostrožac, općina Cazin, na zemljištu označenom kao k.č. broj 442/1 i 441 k.o. Ostrožac, kapaciteta 40 m³/h vibriranog betona; izdano od strane Ministarstva za gradjenje, prostorno uređenje i zaštitu okoliša Unsko-sanskog kantona pod brojem 11/2-23-16205-UP-1/16, dana 07.02.2017. godine, u Bihaću,
- Kopija Izvoda iz plana Usvojenog nacrtu prostornog plana Općine Cazin („Sl. novine Cazin“, broj: 1/07); izdan od strane Službe za urbanizam i zaštitu okoliša Grada Cazina pod brojem: 04-19-8383/2021, dana 19.07.2021. godine,
- Službena zabilješka, broj: UP-I/25-3-40-491-2/21 od 07.12.2021. godine,
- Dopuna glavnog projekta sakupljanja, odvođenja i prečišćavanja otpadnih voda sa lokaliteta betonare „ĐUZELIĆ“ d.o.o. Cazin broj: 2510/21, dana 27.07.2021. godine (na uvid),
- Revizija Dopune Glavnog projekta sakupljanja, odvođenja i prečišćavanja otpadnih voda sa lokaliteta betonare „ĐUZELIĆ“ d.o.o. Cazin; urađena od strane Euroing d.o.o. Bihać pod brojem REV 21-08/21 augusta 2021. godine u Bihaću (na uvid),
- Zaključak o visini i roku za plaćanje posebnih troškova, izdano od strane ove Agencije, broj UP-I/21-3-40-491-3/21, dana 07.12.2021. godine, te kopija uplatnog naloga za iste.

Nakon pregleda dostavljene dokumentacije utvrđeno je da su uz zahtjev dostavljeni potrebni prilozi, te je ovaj organ u skladu sa odredbama zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari. U skladu sa članom 12. stav 5. Pravilnika o sadržaju, obliku, uvjetima i načinu izdavanja i čuvanja vodnih akata („Sl. novine F BiH“ broj 31/15, 55/19 i 41/20), izvršen je pregled izgrađenog objekta pogona za proizvodnju betona sa pratećim sadržajima „ĐUZELIĆ“ d.o.o. Cazin, i tom prilikom sačinjen zapisnik o uvidaju broj: UP-I/21-3-40-491-4/21 od 13.01.2021. godine.

Postrojenje za proizvodnju betona „ĐUZELIĆ“ d.o.o. Cazin je izgrađeno u naselju Ostrožac, Grad Cazin. Pogon se sastoji od: - postrojenja za proizvodnju betona kapaciteta 40 m³/h (sa mješalicom za beton, protuprašnim filterom za zrak, hidrauličnim agregatom mješalice, sistemom za podmazivanje prstenastih brtvi, trakastim transporterima, skipom, vagom za doziranje agregata, vibratorom za pijesak, pužnim transporterom, vagom za doziranje cementa, kompresorom, sistemom za dodavanje aditiva te upravljačkim sistemom betonare), dva vertikalna silosa za cement kapaciteta po 100 m³, deponije kamenog agregata raspoređenog u 5 odjeljaka po frakcijama, upravnog objekta sa garderobom i sanitarijama, internim manipulativnim i saobraćajnim površinama te zelenilom.

Objekt je priključen na javni gradski vodovodni sistem za potrebe sanitarne vode i vode u tehnološkom postupku proizvodnje betona. Ne vrši se povrat otpadne vode (nastala pranjem i održavanjem radnih površina betonare te pranjem automješalice za beton) u proizvodni proces, kako je to navedeno priloženim glavnim projektom. Isto važi i za talog cementnog mlijeka i čestica kamenog agregata koje se istalože u prostoru taložnika, jer taložnik sa sistemom za povrat prečišćene vode u proizvodni proces nije izveden.

Urađena je Dopuna Glavnog projekta sakupljanja, odvođenja i prečišćavanja otpadnih voda sa lokaliteta betonare „ĐUZELIĆ“ d.o.o. Cazin, urađen od strane Instituta za kvalitet, standardizaciju i ekologiju TQM d.o.o. Lukavac pod brojem protokola 2510/21, jula 2021. godine, revidiran od strane Euroing d.o.o. Bihać pod brojem REV 21-08/21, augusta 2021. godine, u Bihaću. Istim je predviđeno da se zauljene oborinske vode sa internih saobraćajnih površina uvode u taložnik za tretman tehnoloških otpadnih voda, a nakon prečišćavanja u separatoru ulja i masti da se prelivaju u spremnik sa pumpnim sistemom za recirkulaciju prečišćene vode u tehnološki postupak.

Na osnovu utvrđenog činjeničnog stanja i dostavljene dokumentacije, a u svrhu smanjenja negativnih uticaja predmetne aktivnosti na stanje voda i prava na vode dodijeljena drugim korisnicima, podnosiocu zahtjeva su ovim vodnim aktom, u tački 3. dispozitiva rješenja, shodno odredbama Zakona o vodama, Uredbe o uslovima ispuštanja otpadnih voda u okoliš i sisteme javne kanalizacije i Pravilnika o sadržaju, obliku, uslovima i načinu izdavanja i čuvanja vodnih akata, propisani uslovi kojih se investitor ima pridržavati.

Na osnovu provedenog postupka konstatuje se da je podnosilac zahtjeva „ĐUZELIĆ“ d.o.o. Cazin ispunio minimum uslova za izdavanje vodne dozvole za ispuštanje tehnoloških otpadnih voda i aktivnosti koje mogu imati specifične uticaje na vode sa lokacije proizvodnog kompleksa objekata betonare, sa pratećim sadržajima,

grad Cazin, te je riješeno kao u dispozitivu ovog Rješenja. Podnosilac zahtjeva je na ime izdavanja ovog vodnog akta izvršio uplatu pristojbe iz tar. broj 43. Zakona o federalnim upravnim pristojbama i Tarife federalnih upravnih pristojbi („Službene novine Federacije BiH“, broj 06/98, 8/00, 45/10 i 45/13).

Uputa o pravnom lijeku:


Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obradivač akta:

Ahmet Smajlović, dipl. inž. arh.

Po ovlaštenju
Rukovodilac sektora za izdavanje vodnih akata



Haris Ališehović, dipl. inž. građ.

Dostaviti:

- „ĐUZELIĆ“ d.o.o. Cazin, Ostrožac 185, 77 220 Cazin
- ☉ AVP Sava, ISV – Vodna knjiga
- Sektor 50
- Sektor 40, arhiva
- Oglasna ploča-AVP Sava